









青羊萬壽宮萬字碑

本宮住持知微楊默然刊

原夫八十一天比太上之半壽六百萬歲當元始之初年道蕝邈以難窮體希夷而莫究在无象无形之内居太初太易之前龍漢之劫再成鳳紀之文未立藏萌芽於浩素隱根榦於厖鴻二神顛顛以俱來鑿開造化三炁氤氲而互進撲散胚腓玄黃流而未凝清濁分而乍結日月星辰之内化出靈宮川原山嶽之中變成洞府則知道為萬氣之祖德為百物之宗以二儀兩曜為子孫以五行四象為枝葉當其洪肇



先啓紫極後成仰其高而弥高考其上而无上八公  
皓首當時之未有乾坤九老白眉厥後而初生天地  
探至真之理臻大道之元列仙之境界延洪上士之  
齒齡逾遠以六千春而爲兩月尚歎浮生以七萬歲  
而爲二年仍嗟短景知者見之謂之知仁者見之謂  
之仁和光而衆曜皆慙挫銳而攢鏃盡碎玄珠匪類  
真璞无瑕學而知之者爲中生而知之者爲上三君  
五老觀兆人如醯雞七聖九皇視百姓如芻狗照千  
古而冰釋成衆善而泉流至明若蒙蒙間而萬物俱

照大巧若拙拙中而萬事皆成爲於無爲用於無用  
黜口爽於五味杜耳聰於八音忘象忘言易脫一時  
之疑無關無鍵難開衆妙之門九萬靈仙聚集於一  
毛之孔三千儒術荒蕪於獨角之端故知儒道二門  
絳綸一揆立清靜爲理體虛無爲師以上天爲大車  
之輪以列宿爲大車之輻駕之以乾馬之馬輓之以  
坤牛之牛般運無爲之功覆載自然之道光而不耀  
養素於蒙昧之中簡而能廉修真於反陋之內不可  
得而踈矣離之而匪遙不可得而親焉用之而逾遠



不可退而讓不可進而求被褐懷玉之人美之又美  
罔象求珠之士斯焉取斯移世界而入壺中吞維摩  
方丈之室縮地形而藏術內掩悉達王舍之城有道  
之根修作立天之址無名之樸標為正化之元三千  
威儀恭謹於文風之教五百戒行肅清於釋氏之門  
張矢為弓調之以陰陽寒暑直道如矢激之以春夏  
秋冬一夫用之而有餘兆人用之而不竭日窟月窟  
隱身而曾作穴居南溟北溟遁迹而聊遊水府桃源  
蓬島從古有而今傳槐市杏壇見朝榮而暮落仙圖

祕密五千載而三傳聖道靈長百萬年而一代容易  
而學之者似紐石以為繩侮慢而求之者如鑽冰而  
討火絕巧棄利顯微闡幽坎離震兌之宮宮內而咸  
居羽客東西南北之斗斗中而皆住真仙身駕德車  
輪轉於混茫之外手持壽柄指揮於開闢之前寂尔  
無聲澹然自得化其不化則萬化以皆成生其不生  
則羣生而盡遂虛懷待物曠意承時藏泰山於秋毫  
之中秋毫仍大納崑崙於黍米之內黍米猶寬大象  
無形五嶽空空而如也大信不約四時默默而行焉



無為之教皆成不宰之功益著

太上金闕玄元天皇大帝則我臣唐之高祖洎于秦  
至開元聖文神武皇帝即三十六代之聖孫赫赫日  
苗布蔭於普天之下明明國葉垂芳於率土之濱當  
其幽原既開九炁陶蒸而未已玄化大闡六虛流轉  
而弗休設不二之教門稽正一之宗本浩風吹海三  
回之重作飛塵劫火銷山五度之却為平地先逍遙  
於青運青運既周後出沒於赤明赤明復畢九十九  
萬億歲貯在彈丸五千五百重天藏於卵殼殷高宗

御極之際周文王演易之初神光流入於瑯胎瑞彩  
結成其金骨不圻不齟誕彌於八十餘齡降瑞降祥  
過期於二萬餘晝足蹈不滅之理手握長生之文包  
乾裹坤把日捉月額列參午項荷圓穹耳開三門鼻  
立雙柱白血紫腦蒼肝青脾項引三十五光齒含四  
十八貝七色青蓮而隨步千年白鹿以呈休桑田變  
而雙檜不凋江河枯而九井不竭苦縣瀨鄉之里靈  
跡長存陳國渦泉之濱神蹤不泯七百弟子指扶桑  
為故林九五帝君開日宮為舊館詳其元始稽彼厥



初俯窺溟滓之前下視崑崙之後隨機設教作萬古  
之楷模應變無方為百王之軌範若乃歲起攝提肇  
開氣象一十二聖之踐祚萬八千年之應圖我  
太上玄元聖祖應運降迹與天皇為師上清下濁之  
初開相離弗遠六合八紘之乍坼相去未遙正方圓  
上下之形定洪荒朴畧之狀川新融而水仍晦山始  
結而石未堅種天上之白榆初生歷歷指月中之青  
桂乍出依依配四海於四神付五行於五帝是時乾  
象猶低坤形尚薄立極定位敷化建功我

太上聖祖屑迹下降與地皇為師分配剛柔制定寒  
暑地增博厚天益高明聖力難窮神功靡測萬木甲  
坼萬草勾萌羽族毛羣區別於允禪之位介蟲鱗類  
支分於坎震之宮四溟之水皆空未生魚鱉五嶽之  
形俱靜未吐雲霞已逾清海之年又禪清海之歲二  
聖既理四表生光我

太上聖祖博施濟衆與人皇為師三百六十之川初  
分血脉一萬五千之策乍配偶奇三壬三乙之神離  
胎於水木六丙六辛之將出孕於火風一百五十六



代四萬五千餘年始稱通玄天師再號金闕帝君三名盤古先生洎乎庖羲氏之王天下也我太上聖祖以道弘濟降迹為師仰觀圓蓋之文俯察方輿之理教之以畫八卦指之以分三才助之以造書契之文製之以代結繩之政典墳自我而出經籍自我而生以畋以漁蓋取明離之象一索再索用乎出震之功鳳凰呈瑞於帝廷龍馬負圖於河洛享國一萬八千歲矣洎乎連山氏之王天下也我太上聖祖救時屈已下為帝師付之以五運分之以

四時助之以正萬機明之以辨百穀變飲血茹毛之化移塊桴土鼓之音毀穴焚巢上棟下宇範金合土燔黍擘豚製耒耜以濟兆民作陶冶以利萬物天雨粟以呈瑞地芸稼而彰稔農食嘉谷山出器車洎乎有熊氏之王天下也我

太上聖祖隱身於崆峒之中放心於杳冥之外帝乃親降輦輅禮展師資能摳衣以趨隅遂屈膝而問道當是時也榆罔凌雲蚩尤作亂化魚鰲為兵士以助王師變雲霧為神祇潛伏軍陣能弭兵於涿鹿致偃



戈於阪泉東遊青丘之鄉北到洪隄之景受丹經於  
王屋登蒼冥於鼎湖屈軼既生冀茨復出若非大道  
孰可致斯洎乎金天氏之王天下也承姬水之源襲  
熊山之錄告天類帝纘緒守文我

太上聖祖乘九龍之輦降以為師號太極先生說莊  
敬之典教之以順時迎氣昭配神明禋于六宗秩於  
羣望乾乾翼翼得禮之宜羽族呈祥命之以鳥官為  
理布分九鳳以統百司景合璧以表靈鳳啣菡而示  
貺悉由至道彰此帝謨逮至高陽氏之王天下也我

太上聖祖教之以解紛塞兌治國安民滌蕩九黎陟  
明八海有龍野紫髯之兇醜有蛇身赤髮之渠魁力  
拔不周首觸山碎天低西北致日月之西行地凹東  
南使江河之東注追呼六甲役御百靈訓之以微言  
之經教之以大順之道乘玄虬之迅駕或適幽陵御  
素螭以遐遊或臻蟠木觀吾仙棹萬年而一度開花  
觀我靈瓜四劫而一回結實及乎高辛氏之王天下  
也我

太上聖祖敷道布化濟代為師談黃庭之妙言隱日



遁月稱錄畷之嘉號返邑移城制九州之名作六英  
之樂封勾芒以佐蒼帝勅蓐收以翼白方封岱嶽而  
印金泥照寰區而開玉鏡飲太和之井遊不夜之鄉  
燔青鸞之膏充下仙之次饌擘黃騏之脯為上客之  
珍饈逮至陶唐氏之王天下也我

太上聖祖暫垂至理下降為師講玄德之經道以匡  
於玄化應丹陵之瑞名異列於丹丘和煦清風不作  
鳴條之響雍熙黃髮時聞擊壤之聲庖厨之肉脯自  
生截餽失味山谷之醴泉潛湧麴蘖無功達四聰以

闢四門立五事而敷五教披鹿裘以食糲饌端拱於  
土堦掛鶴氅而飲流霞凝思於瑤圃有虞氏之王天  
下也我

太上聖祖談無為之理講離合之經三苗克悛四罪  
咸服百揆時序五典慎徽懷神明之珠賜照華之玉  
眉與髮等表踐祚之嘉祥壽與天齊彰延齡之景福  
甄一十六相用二十五臣致百辟以協和如魚在水  
感兆民之歸湊如蟻慕膾化靈炁為天書何勞筆力  
結卿雲為寶殿不假人工夏后氏之王天下也我



太上聖祖克匡王道爰作帝師談德戒之經行為國  
之法櫛木風雨刊槎山林成九年理水之功為四載  
勤王之業卑宮陋室盡力於溝洫之時褫服縷衣飾  
身於黼冕之禮道馬頰而奔流竹箭鑿龍門而迅激  
桃華救兆庶而皆免為魚濟陸土而永非成海胷羅  
玉斗挂天文之在躬手展瑤圖懸國命之由已故知  
大道者王教之冠冕上德者百聖之宗元成湯氏之  
王天下也我

太上聖祖權離左極下為王師說長生之經體自然

之道去三面之網開一目之羅獸遠逝而莫縈禽高  
翔而不罥引萬方而罪已數六事以責躬話之以八  
素七真講之以六虛十訣千歲桃花之密味掩朱漿  
九垓薤葉之蔬滋霑紅露乘三光而電轉駕六氣以  
煙騰窺海瀆如涓泮視蒿衡如罍粟食風飲露跨空  
躡虛以十洲為少遊之宮以六極為暫別之館驅徭  
中士役試下仙素髮一莖懸起萬斤之石綠筠數尺  
變成百丈之龍得之者七祖超升失之者一生迷悟  
必在堅修慎習棄苦忘辛可以陶冶二儀埏埴九土



青羊肆者按本紀則

太上玄元大帝第二降生之所自殷道否閉周德陵夷陸海沸騰百川振動山鳴谷吼雨嘯風號歷藏史以同塵弃柱下而隱迹東離魏闕西度函關乘青牛宛轉之車駕白鳳逍遙之輦徐甲執御從仙帝以爰來尹喜占風知道君之必至暫別而三千甲子曾作赤童相逢而八百年齡永依黃老潛傳妙訣暗付微言重為千日之期再結一時之會暫朝元始却上天中之天永奉宗師重歸象外之象開寒靈之丹殿登

衆寶之瓊臺坐紫金之林凭碧琳之杭太清仙伯伏星光錦文之旂太極仙翁執月華命神之節皆拜首稽首以心觀心於是勅青帝之青童化羊於蜀國乘紫雲於紫府降瑞於王宮將停不噉之聲頃及來斯之乳俄聞喜至頃止嬰啼爰從赤子之身却變白頭之士頃刻而身餘十尺須臾而面放五光頭載七曜玲瓏之冠肩垂九色離羅之帔衛士逾億從仙成羣感十方之衆真遍滿寥廓應八表之瑞氣充塞虛空香散九微之煙花飛六出之雪將離蜀土欲化胡風



遠適流沙長移獷俗及身毒罽賓之國教煩陀阿柱  
之王恣剛理愎戾之心起烹焚鑿刺之意臣錡燃湯  
以沸地我則入之如涼泉積薪烈火以連天我則坐  
之如紺霧挾白挺者觀如蓬草持赤刃者視若鉛刀  
四天之兵衆俱來聲喧霹靂萬里之神祇共護力轉  
山河八十一種之獠戎皆歸清化二千餘國之獷悍  
永革婚風俗既變矣道既成矣分身作佛濟如來千  
劫之功降迹為師救王者萬機之務至若銅渾測運  
玉曆推禎天七五而一三及九乃滿地八六而二四

至十乃盈變通陽九之灾窮研百六之數雖慮羲軒  
昊之代無以免斯高辛唐虞之朝不能避此粵以廣  
明元祀歲在上章月當大蜡臣猾開釁於天邑渠魁  
倣擾於國步兵纏九野羣臣咸議於省方蛇起陸風  
四嶽齊迎於逖狩長鯨呀口聞飲灋吐瀉之聲封豕  
橫牙衝列刃攢鏃之隊牛虻未搏食吾黎庶之膏象  
蟻未除穴我樓臺之地塵蒙華蓋盜梗天衢九龍齊  
駕於雲輿玉輪西轉萬乘同回於坤軸金闕南開涉  
水則波神捧舟登陸則地祇扈跸太玄城内化出行



宮濯錦江邊權安正殿執玉帛者數盈萬國列鴛鴦  
者位滿千官雞林之郡來朝鰲山解纜鶴拓之城入  
貢象駕來王當戎夷率服之辰成文軌混同之日苗  
人來格方資益贊之謀扈氏延誅正賴胤師之力熊  
韜虎韜之將俯立軍功龍角羊角之山可追聖瑞二  
十八化猶乘白鹿而來一百六灾必跨蒼虬而救潜  
扶宗杜幽贊子孫赤光照灼於庭臺太平顯兆紫炁  
晶熒於梅篠元吉尤彰稽彼变通明茲感應尋其靈  
迹果獲寶甄上有古篆文曰太上平中和灾於是驗

其六字表此百祥擊之則聲類鳴璆觀之則狀如弘  
璧歷周秦漢魏之代玉篆仍新經晉宋梁隋之朝銀  
鈎不故藏諸韞匱祕是緘滕克盛皇猷顯標青史歲  
代絲邈疆井变移舊址苔封古壇蕪沒仙鄉故里半  
落俗家真境餘風惟殘瓦礫枯松夜月稀聞玄鶴之  
聲暮草秋煙空聽莎雞之響當時雲洞多隱狐狸昔  
日芝田盡生禾黍遐追靈迹顯驗休禎皇帝特下明  
詔初造靈宮恩賜内外行用庫錢二百萬爰徵班匠  
乃速厥功於是木神選材九層重構地祇獻土百堵



俱興水伯進泉以為池山靈走石而作礎巍峩雲閣  
乍似化成岌業霞堂初疑湧出簷張羽翼棟壓虹霓  
粉壁霜凝丹楹火亘窓籠倒景戶闢長霄塑像新成  
形儀乍降神情欲語似講五千之文意兒將行遽化  
十方之士金鑪芬馥寶繖回旋乍覩出藍之羊猶疑  
跪乳初觀如練之馬當慮嘶風庭剪蓬茅重生瑤草  
園除萱槿再吐瓊花崗阜崔嵬樓臺軒敞齊東溟圓  
嶠之殿抗西極化人之宮掌劍閣之靈威盡歸行在  
簇峩眉之秀炁半入都城煙粘碧壇風引清磬故得

五老下降四真俱來畫地而成江湖撮土而作山嶽  
坐致風雨可以倒洛傾河立起雲煙可以返晝作夜  
化草木以成軍旅變士馬以為叢林如斯出師豈惟  
百勝如斯伐叛何啻一擒是以天灾流行盡彼盈虛  
之理曆數倚伏稟其否泰之宜左慈呼召於神兵鞭  
笞群盜許遜旨揮於力士剪蕩狂妖所以陰隲兆民  
彌綸萬聖鄒瞞丹水屢陳馘告之功牧野昆陽累獻  
遺俘之捷戈甲耀乎八水營壘塞乎四郊陣勢雲橫  
軍聲雷動



血灑空而驟雨赤沙漲野而飄風黃困獸摧牙長蛇  
畏尾郊鄴人之消潰觀楚幕以盡空德均而義士致  
身氣直而王師難老度日而長鳴金鼓曾不告勞終  
年而不解鐵衣未嘗言苦既而鳳城光復龍德昭明  
枉矢當絃穿之功奚用長竿在手撞天之勢何為  
遂至修鯢脫泉狂兇入匣師道運末斷領於赤心之  
徒祿山數窮劈腹於蒼頭之輩况逆巢干紀悖氣凌  
空鳴蝼蝻七八餘齡聚材狼數十萬衆傷殘九土凌  
犯二京蓋祝天網以緩誅布仁風而寬戮遂偷生之

五載併除惡於一時蚩尤之塚既成堅埋鐵額長狄  
之喉已斷永戢雕戈立此神功實資道力我  
太上金闕玄元天皇大帝爲天地父母作帝王宗師  
歷教三皇皆萬八千歲候乎四氣交會五運合同國  
位永扶於子孫聖祚上齊於日月克紹萬八千之歲  
矣我

高祖神堯皇帝應天受命曆數在躬以鄉觀鄉去仙  
鄉而無遠上德不德增帝德以弥高輟九赤之班符  
封山印海追八景之仙輅輾霧盤雲負宸垂流當陽



闡化我

太宗文武皇帝握乾闡坤修文偃武大禮無體百禮而盡執根元大音無聲一聲而振動今古天賜勇智繫虎豹如束芻神助皇威跼蛟螭如結蚓還真返素遊藝依仁以無繩為繩縛六雄與五罷以不器為器籠四海與九州然後爭於不爭則戰爭而永息欲於不欲則嗜慾以長消方士衆臻真公來格安期之棗異狀大若瓠瓜園客之蜃殊形磊如盆盎垂衣一百五十代享國一萬八千年伏惟

聖神聰睿仁哲明孝皇帝陛下克紹丕圖統茲大業心懸壽鏡身享福庭帝道中興國基深固永保神器長鎮皇綱虎牙將軍領八千之勇士龍頭元帥提百萬之精兵永以鎮定區中永以削平天下巨鼇斃而形軀塞海長鯨戮而鬚鬣挿天或炙或焚盡千山之木以烹以飪竭五湖之泉紫焰腥膻青萍膏血祆日墮落孛星隕墜蒼旻開豁黑氣消亡獻巨逆之三顛告行朝之五廟耀武威之英代立京觀於神州歲越大椿年逾巨浸天睠北顧備法駕以返堯庭地澤東



流乘仙輿而懷魏闢集群牧以頒瑞朝諸侯於明堂  
撫逸搜沉興滅繼絕八龍雲篆降禹迹之天書二武  
聖文炳商周之仁德中階平而國泰至德正而時雍  
成寶祚之神功由太上之聖力端拱垂衣恭己正南  
面而以矣劔南西川節度使太尉兼中書令潁川郡  
王陳敬瑄夏日高懸吐赫曦之可畏德星永聚寶祥  
瑞以明標遙闢龜城遠迎龍駕獻璇璣以酌大化如  
轉碧天移蓬萊以作行宮似離滄海郭琪扇搖於行  
伍阡能搔動於山林韓秀昇聚蚊為雷楊師古積螢

闔日生擒者有同縛鼠誅戮者無異剗羊舞百獸於  
庭前堪標玉牒後五丁於麾下可碎鐵山雖文公武  
侯之才蕭何王濬之策未可與儔昔韋南康鎮成都  
二十餘載郭汾陽為輔弼二紀在朝比其勲庸量其  
惠化則請留九閏之儲一袞之歲未為多矣耀陳氏  
劍南之政掩裴度淮西之功具載典彝永光勛績行  
在都指揮使左神策軍中尉十軍軍容使田令孜岷  
峴玉柱獨力扶天太華金蓮張心捧日佐聖而出為  
國而生有逾千越萬之才有問一知十之智暖然和



氣助青帝發生之仁卓爾高情仰素王垂訓之道觀  
帝符而五賊皆見握人鏡而萬象難逃聰可聽其無  
聲明可察其不昧弼時立德開國成家賞罰無私九  
土之諸侯懷惠恩威普及十軍之帥將歸心克己推  
誠虔心奉道古原曾構敬之而無異丹臺舊觀規繩  
仰之而如昇白日禮無上之帝主事威儀之法王神  
獸八千衝犀象如蝼蟻天丁三億轉海嶽如萍蓬周  
尚父之功成身居第一漢鄼侯之績著才獨無雙鏤  
鼎銘鐘紀勛頌德左僕射平章事蕭遘器業絕綸神

秀貫古筆海壓淮湖之浪學山凌衡華之峯天植國  
禎文滋相業一匡皇化八秉洪鈞函丈之間布奇兵  
之億萬跬步之內安率上之烝黎黃鶴頻鳴雖召公  
之可控青牛不喘或丙吉以難知吏部尚書平章事  
韋昭度宗廟重器社稷令臣當昂位以星懸鎮台階  
而山立運珪璋特達之德植松筠貞固之心窮訓典  
以立身正風正雅調鹽梅以味道肥國肥家仲父上  
公空就九三之位大臨禱戲虛垂二八之名兵部尚  
書平章事裴徹澤馬表瑞天驥呈才雄節貫時清風



滌俗銀漢橫空而高朗玉繩垂象之英華學川則四  
瀆波瀾書林則五松烟雨正氣凜于朝野直道貫於  
羊腸自輟職瀛洲登庸昭代重持傳說之舟楫再秉  
臯陶之鈞衡皆磨智刃而裁莽腰盡淬文鋒而剗卓  
腹內飛龍使揚復恭甲門華胄鼎旋令名三教精通  
九流澄徹體物則左張却立緣情則鮑謝推先論昆  
仲而八龍掀髯談經史而五鹿折角秉樞衡於累代  
貫名氏於百家稟吳季札之仙姿抱孔文字之敏惠  
青山蘊玉發群岫以光輝綠水懷珠起一川之晶彩

內樞密使開府儀同三司苗胤禮四瀆比位五星炳  
靈清掩玉壺義輕金諾智圓若月長垂助日之光辯  
注如川每湊為玉之海秉氣正直執心溫恭王佐弘  
才帝臣重器當軸而身回地紀持樞而手正天文宿  
稟道門素欽真教信言不美常行質奏之詞法語可  
遵每契和平之理內樞密使驃騎大將軍李順融三  
傑挺生千山發秀元禮龍門之峻慶及令孫少君鶴  
駕之高福滋靈葉掌萬機之密務濟一國之黎人公  
清而水鏡含虛正直而朱繩讓美博學則丘墳著績



操觚則錦秀成文實腹守真棄百慮於襟懷之外虛  
心待物納八荒於方寸之間監軍使驃騎大將軍兼  
三川制置都監劉景宣景宿呈祥卿雲布彩風骨俊  
邁才量宏深淮南王之瑤枝驂鸞不遠河上公之蘭  
友跨鶴非遙讚襄克勤勲庸永著右街威儀明道大  
師尹嗣玄太仙靈苗高族茂葉

太上玄元之上足文始真君之哲孫七歲悟道十三  
逢師紫玉之骨將成終遊閬苑黃書之文已究即上  
朱陵道士李無為國源清派天葉芳陰真訣千重窮

研咸達仙經萬卷諷覽無遺皆同在師門結為道友  
三天鳳璽化靈炁以成書一粒龍丹注童顏而度劫  
星冠月帔上禮於元皇虹轡雲輿前朝於大帝金螭  
五斛暗吐仙絲瓊節一雙遙迎真侶自昔忠臣明主  
咸理國以昇天應曆運以救時蘇生靈而畢績少昊  
顓頊皆上紫微之宮召爽太公俱乘碧霞之輦其宮  
室牖戶臺榭池沼似雲霧以結成如丹青之寫出七  
十二之福地三十六之洞天神仙之窟宅相連以青  
城為戶牖真境之風煙不雜以嶓冢為壇臺可以濟



度四迷開弘七部仙衣非製而自有豈假紉鍼仙車  
不駕而自行曾無轍迹九重天上白玉為京千雉城  
中黃金作殿被袞服而身掛日月戴冕旒而坐鎮乾  
坤天網正而四氣和國步安而三元序手執長生之  
柄制度白駒心藏要道之根控乘赤鯉况乎代變時  
遷繇歷於三千餘歲邦建國立崢嶸於四萬餘年門  
巷新成人煙漸熾當時鬬鬪髮髯如存今日宮庭精  
新尤甚七色鳳輦駕幸仍頻九斑龍輿巡禮弥敬太  
虛天館常開不夜之庭無極福堂永對長春之景氣

連碧落光掩赤城臣職忝禁林身叨詞客涉學海而  
素淺渡文河而不深董仲舒五彩之蛟稀來筆下楊  
子雲三清之鷄少到毫端愧無黃絹之才難紀紫煙  
之瑞詞曰

洪源肇開	浩劫無際	恍惚大道	希夷象帝
太初既隱	太始來繼	玄黃在殼	清濁未蛻
天地之前	億千萬歲	山比我久	如電之逝
海比我大	如絲之細	與釋比校	空門永閉
與儒並功	章甫無勢	昭德塞違	解紛挫銳



設教隨機	應變無滯	三皇益明	五帝增睿
率土皆泰	羣生成濟	樓觀發軔	函關挂轄
屬賓闡化	身毒布惠	無狀之狀	無聲之聲
去莫可送	來莫可迎	強字之字	強名之名
太虛之上	黃金為城	杳冥之外	白玉作京
煥赫六極	牢籠八紘	萬國同酌	百谷咸傾
莫得而竭	莫得而盈	淺而行者	長居利貞
深而行者	永致太平	凜凜烈氣	化作天丁
鬱鬱勁草	變為神兵	火刀電耀	霜劍虹明

覓戮封豕	瓜剖長鯨	地古風變	俗阜時清
年代緜邈	歲月崢嶸	新宮是建	永觀厥成
赫赫高祖	明明聖孫	開鑿造化	剗剔胚腴
把捉日月	包裹乾坤	鸞蹕鳳跼	虎步龍躡
鳥卵之中	可納穹旻	黍粒之內	能藏崑崙
塵波澄徹	智浪淵淪	迷羅自解	瑩鏡難昏
萬象俱靜	惟道獨存	三教爭長	惟道獨尊
心藏五賊	國靜九門	蓬蓬諫鼓	沉沉衢樽
五方八貢	八表爭奔	車徒川鶩	租稅云屯



魏我玉皇	煥赫金籙	雲宮八海	水府四瀆
堯湯寶位	舜禹天祿	巨寇梟殄	神州克復
去召千神	來臻百福	天轉碧輪	地旋黃轂
獻玉十珏	貢金九牧	寒暑運行	禎祥倚伏
害蛟斃刃	狂兇殪鏃	軒鏡在握	殷繩當木
瓊臺九層	銀螯五斛	手指青牛	身騎白鹿
洞啓括蒼	天開王屋	皇根國葉	帝宗天族
明堂端拱	元臣啓沃	四海萬方	無思不服
九虬夭矯	雙鳳回旋	鶴駕清漢	鸞驂紫煙

累行盈百	積功滿千	丹瓊樓高	上接九天
碧玉壇峻	下降八仙	犬臥蓬島	龍耕芝田
地有謙道	東走衆川	人居上德	南御群賢
太和之井	長生之泉	延洪聖祚	萬八千年
鶴涅不緇	鳥非染黑	然於自然	得於自得
何以發蒙	內辯其惑	何以開悟	中脩其惑
如車指南	似星拱北	隱見無常	變化不測
大象難包	二儀益塞	大智難展	六合陋互
長生之柄	永壽之域	朝服刀圭	暮生羽翼



廟獻三顙 風清萬國 靈觀新構 羣仙來格  
瑤宮寶臺 玉書金策 豐碑嶽立 巨龜鼇逼  
詞惟頌美 文匪誕飾 鸞鶴羽躡 龍蛇騰躡  
紫氣氤氲 赤光歛綽 七聖握畷 九皇執勅  
梵宇無光 儒宮失色 端冕明堂 垂旒御極  
運齊三五 慶延萬億 開闢寰區 咸歸道德  
永致中興 皆從帝力

大唐僖宗中和三年癸卯五月丙寅日翰林學士承  
旨兵部侍郎樂朋龜撰







